

מִיכָה

1 דבר יהוה אשר היה אל מיכה המרשתי בימי יותם אחז יחזקיה מלכי יהודה אשר חזה על שמרון וירושלם: 2 שמעו עמים כלם הקשיבי ארץ ומלאה ויהי אדני יהוה בכם לעד אדני מהיכל קדשו: 3 כי הנה יהוה יצא ממקומו וירד ודרך על במותי ארץ: 4 ונמסו ההרים תחתיו והעמקים יתבקעו כדונג מפני האש כמים מגרים במורד: 5 בפשע יעקב כל זאת ובחטאות בית ישראל מי פשע יעקב הלוא שמרון ומי במות יהודה הלוא ירושלם: 6 ושמתי שמרון לעי השדה למטעי כרם והגרתי לגי אבניה ויסדיה אגלה: 7 וכל פסיליה יכתו וכל אתנניה ישרפו באש וכל עצביה אשים שממה כי מאתנן זונה קבצה ועד אתנן זונה ישובו: 8 על זאת אספדה ואילילה אילכה שילל וערום אעשה מספד כתנים ואבל כבנות יענה: 9 כי אנושה מכותיה כי באה עד יהודה נגע עד שער עמי עד ירושלם: 10 בנת אל תגידו בכו אל תבכו בבית לעפרה עפר התפלשתי: 11 עברי לכם יושבת שפיר עריה בשת לא יצאה יושבת צאנן מספד בית האצל יקח מכם עמדתו: 12 כי חלה לטוב יושבת מרות כי ירך רע מאת יהוה לשער ירושלם: 13 רתם המרכבה לרכש יושבת לכיש ראשית חטאת היא לבת ציון כי בכך נמצאו פשעי ישראל: 14 לכן תתני שלוחים על מורשת גת בתי אכזיב לאכזב למלכי ישראל: 15 עד הירש אבי לך יושבת מרשה עד עדלם

יבוא כבוד ישראל: ¹⁶ קרחי וגזי על בני תענוגיד הרחבי
קרחתך כנשר כי גלו ממך:

2

¹ הוי חשבי און ופעלי רע על משכבותם באור הבקר
יעשוה כי יש לאל ידם: ² וחמרו שדות וגזלו ובתים
ונשאו ועשקו גבר וביתו ואיש ונחלתו: ³ לכן כה אמר
יהוה הנני חשב על המשפחה הזאת רעה אשר לא תמישו
משם צוארתיכם ולא תלכו רומה כי עת רעה היא:
⁴ ביום ההוא ישא עליכם משל ונהה גהי נהיה אמר
שדוד נשדנו חלק עמי ימיר איך ימיש לי לשובב שדינו
יחלק: ⁵ לכן לא יהיה לך משליך חבל בגורל בקהל
יהוה: ⁶ אל תטפו יטיפון לא יטפו לאלה לא יסג כלמות:
⁷ האמור בית יעקב הקצר רוח יהוה אם אלה מעלליו
הלוא דברי ייטיבו עם הישר הולך: ⁸ ואתמול עמי
לאויב יקומם ממול שלמה אדר תפשטון מעברים בטח
שובי מלחמה: ⁹ נשי עמי תגרשון מבית תענניה מעל
עלליה תקחו הדרי לעולם: ¹⁰ קומו ולכו כי לא זאת
המנוחה בעבור שמאה תחבל וחבל נמרץ: ¹¹ לו איש
הלך רוח ושקר כזב אטף לך לייז ולשכר והיה מטיף
העם הזה: ¹² אסף אסף יעקב כלך קבץ אקבץ שארית
ישראל יחד אשימנו כצאן בצרה כעדר בתוך הדברו
תהימנה מאדם: ¹³ עלה הפרץ לפנייהם פרצו ויעברו
שער ויצאו בו ויעבר מלכם לפנייהם ויהוה בראשם:

3

1 ואמר שמעו נא ראשי יעקב וקציני בית ישראל הלוא לכם לדעת את המשפט: 2 שנאי טוב ואהבי רעה גולי עורם מעליהם ושארם מעל עצמותם: 3 ואשר אכלו שאר עמי ועורם מעליהם הפשיטו ואת עצמתיהם פצחו ופרשו כאשר בסיר וכבשר בתוך קלחת: 4 אז יזעקו אל יהוה ולא יענה אותם ויסתר פניו מהם בעת ההיא כאשר הרעו מעלליהם: 5 כה אמר יהוה על הנביאים המתעים את עמי הנשכים בשניהם וקראו שלום ואשר לא יתן על פיהם וקדשו עליו מלחמה: 6 לכן לילה לכם מחזון וחשכה לכם מקסם ובאה השמש על הנביאים וקדר עליהם היום: 7 ובשו החזים וחפרו הקסמים ועטו על שפם כלם כי אין מענה אלהים: 8 ואולם אנכי מלאתי כח את רוח יהוה ומשפט וגבורה להגיד ליעקב פשעו ולישראל חטאתו: 9 שמעו נא זאת ראשי בית יעקב וקציני בית ישראל המתעבים משפט ואת כל הישרה יעקשו: 10 בנה ציון בדמים וירושלם בעולה: 11 ראשיה בשחד ישפטו וכהניה במחיר יורו ונביאיה בכסף יקסמו ועל יהוה ישענו לאמר הלוא יהוה בקרבנו לא תבוא עלינו רעה: 12 לכן בגללכם ציון שדה תחרש וירושלם עיין תהיה ותר הבית לבמות יער:

4

1 והיה באחרית הימים יהיה הר בית יהוה נכון בראש ההרים ונשא הוא מגבעות ונהרו עליו עמים: 2 והלכו גוים רבים ואמרו לכו ונעלה אל הר יהוה ואל בית אלהי יעקב ויורנו מדרכיו ונלכה בארחתיו

כי מציון תצא תורה ודבר יהוה מירושלם: ³ ושפט בין עמים רבים והוכיח לגוים עצמים עד רחוק וכתתו חרבתיהם לאתים וחניתתיהם למזמרות לא ישאו גוי אל גוי חרב ולא ילמדון עוד מלחמה: ⁴ וישבו איש תחת גפנו ותחת תאנתו ואין מחריד כי פי יהוה צבאות דבר: ⁵ כי כל העמים ילכו איש בשם אלהיו ואנחנו נלך בשם יהוה אלהינו לעולם ועד: ⁶ ביום ההוא נאם יהוה אספה הצלעה והנדחה אקבצה ואשר הרעתי: ⁷ ושמתי את הצלעה לשארית והנהלאה לגוי עצום ומלך יהוה עליהם בהר ציון מעתה ועד עולם: ⁸ ואתה מגדל עדר עפל בת ציון עדיך תאתה ובאה הממשלה הראשנה ממלכת לבת ירושלם: ⁹ עתה למה תריעי רע המלך אין בך אם יועצך אבד כי החזיקך חיל כיולדה: ¹⁰ חולי וגחי בת ציון כיולדה כי עתה תצאי מקריה ושכנת בשדה ובאת עד בבל שם תנצלי שם יגאלך יהוה מכף איביך: ¹¹ ועתה נאספו עליך גוים רבים האמרים תחנף ותחזו בציון עינינו: ¹² והמה לא ידעו מחשבות יהוה ולא הבינו עצתו כי קבצם כעמיר גרנה: ¹³ קומי ודושי בת ציון כי קרנך אשים ברזל ופרסתיך אשים נחושה והדקות עמים רבים והחרמתי ליהוה בצעם וחילם לאדון כל הארץ:

5

¹ עתה תתגדדי בת גדוד מצור שם עלינו בשבט יכו על הלחי את שפט ישראל: ² ואתה בית לחם אפרתה צעיר להיות באלפי יהודה ממך לי יצא להיות מושל

בישראל ומוצאתיו מקדם מימי עולם: ³ לכן יתנם עד
 עת יולדה ילדה ויתר אחיו ישובון על בני ישראל:
⁴ ועמד ורעה בעז יהוה בגאון שם יהוה אלהיו וישבו
 כי עתה יגדל עד אפסי ארץ: ⁵ והיה זה שלום אשור כי
 יבוא בארצנו וכי ידרך בארמנתינו והקמנו עליו שבעה
 רעים ושמנה נסיכי אדם: ⁶ ורעו את ארץ אשור בחרב
 ואת ארץ נמרד בפתחיה והציל מאשור כי יבוא בארצנו
 וכי ידרך בגבולנו: ⁷ והיה שארית יעקב בקרב עמים
 רבים כטל מאת יהוה כרביבים עלי עשב אשר לא יקוה
 לאיש ולא ייחל לבני אדם: ⁸ והיה שארית יעקב בגוים
 בקרב עמים רבים כאריה בבהמות יער ככפיר בעדרי
 צאן אשר אם עבר ורמס וטרף ואין מציל: ⁹ תרם
 ירך על צריך וכל איביך יכרתו: ¹⁰ והיה ביום ההוא
 נאם יהוה והכרתי סוסיך מקרבך והאבדתי מרכבתך:
¹¹ והכרתי ערי ארצך והרסתי כל מבצריך: ¹² והכרתי
 כשפים מידך ומעוננים לא יהיו לך: ¹³ והכרתי פסיליך
 ומצבותיך מקרבך ולא תשתחוה עוד למעשה ידיך:
¹⁴ ונתשתי אשיריך מקרבך והשמדתי עריך: ¹⁵ ועשיתי
 באף ובחמה נקם את הגוים אשר לא שמעו:

6

¹ שמעו נא את אשר יהוה אמר קום ריב את ההרים
 ותשמענה הגבעות קולך: ² שמעו הרים את ריב יהוה
 והאתנים מסדי ארץ כי ריב ליהוה עם עמו ועם ישראל
 יתוכח: ³ עמי מה עשיתי לך ומה הלאתיך ענה בי:

4 כי העלתוך מארץ מצרים ומבית עבדים פדיתוך ואשלח לפניך את משה אהרן ומרים: 5 עמי זכר נא מה יעץ בלק מלך מואב ומה ענה אתו בלעם בן בעור מן השטים עד הגלגל למען דעת צדקות יהוה: 6 במה אקדם יהוה אכף לאלהי מרום האקדמנו בעולות בעגלים בני שנה: 7 הירצה יהוה באלפי אילים ברבבות נחלי שמן האתן בכורי פשעי פרי בטני חטאת נפשי: 8 הגיד לך אדם מה טוב ומה יהוה דורש ממך כי אם עשות משפט ואהבת חסד והצנע לכת עם אלהיך: 9 קול יהוה לעיר יקרא ותושיה יראה שמך שמעו מטה ומי יעדה: 10 עוד האש בית רשע אצרות רשע ואיפת רזון זעומה: 11 האזכה במאזני רשע ובכיס אבני מרמה: 12 אשר עשיריה מלאו חמס וישביה דברו שקר ולשונם רמיה בפיהם: 13 וגם אני החליתי הכותך השמם על חטאתך: 14 אתה תאכל ולא תשבע וישחך בקרבך ותסג ולא תפליט ואשר תפלט לחרב אתן: 15 אתה תזרע ולא תקצור אתה תדרך זית ולא תסוך שמן ותירוש ולא תשתה יין: 16 וישתמר חקות עמרי וכל מעשה בית אחאב ותלכו במעצותם למען תתי אתך לשמה וישביה לשרקה וחרפת עמי תשאו:

7

1 אללי לי כי הייתי כאספי קיץ כעללת בציר אין אשכול לאכול בכורה אותה נפשי: 2 אבד חסיד מן הארץ וישר באדם אין כלם לדמים יארבו איש את

אחיהו יצודו חרם: ³ על הרע כפים להיטיב השר שאל
 והשפט בשלום והגדול דבר הות נפשו הוא ויעבתוה:
⁴ טובם כחדק ישר ממסוכה יום מצפיך פקדתך באה
 עתה תהיה מבוכתם: ⁵ אל תאמינו ברע אל תבטחו
 באלוף משכבת חיקך שמר פתחי פיך: ⁶ כי בן מנבל
 אב בת קמה באמה כלה בחמתה איבי איש אנשי ביתו:
⁷ ואני ביהוה אצפה אוחילה לאלהי ישעי ישמעני אלהי:
⁸ אל תשמחי איבתי לי כי נפלתי קמתי כי אשב בחשך
 יהוה אור לי: ⁹ זעף יהוה אשא כי חטאתי לו עד אשר
 יריב ריבי ועשה משפטי יוציאני לאור אראה בצדקתי:
¹⁰ ותרא איבתי ותכסה בושה האמרה אלי או יהוה
 אלהיך עיני תראינה בה עתה תהיה למרמס כשיט
 חוצות: ¹¹ יום לבנות גדרריך יום ההוא ירחק חק: ¹² יום
 הוא ועדיך יבוא למני אשור וערי מצור ולמני מצור
 ועד נהר וים מים ונהר ההר: ¹³ והיתה הארץ לשממה
 על ישביה מפרי מעלליהם: ¹⁴ רעה עמך בשבטך
 צאן נחלתך שכני לבדד יער בתוך כרמל ירעו בשן
 וגלעד כימי עולם: ¹⁵ כימי צאתך מארץ מצרים אראנו
 נפלאות: ¹⁶ יראו גוים ויבשן מכל גבורתם ישימו יד על
 פה אזניהם תחרשנה: ¹⁷ ילחכו עפר כנחש כזחלי ארץ
 ירגזו ממסגרתיהם אל יהוה אלהינו יפחדו ויראו ממך:
¹⁸ מי אל כמוך נשא עון ועבר על פשע לשארית נחלתו
 לא החזיק לעד אפו כי חפץ חסד הוא: ¹⁹ ישוב ירחמנו
 יכבש עונתינו ותשליך במצלות ים כל חטאותם: ²⁰ תתן
 אמת ליעקב חסד לאברהם אשר נשבעת לאבתינו מימי

7:20 מִיָּקָה

viii

7:20 מִיָּקָה

קדם:

מודרני עברי ד תנ

The Holy Bible in Modern Hebrew

Public Domain

Language: עברית (Hebrew)

2022-06-14

PDF generated using Haiola and XeLaTeX on 11 Nov 2022 from source files dated 15 Jun 2022

53d9715c-3509-54f2-9e87-2cb0afdfb800